


Paskua 2013

SDB no FMA

HAFUTARAN HO KÓR KSOLOK NIAN

Oratóriu iha Timor: Uma fiar nian



PASKUA

Tempu Paskua nian mak tempu ksolok nian: ksolok tanba Maromak hadomi ita to'o saran ninia Oan mane nia moris atu soi ita; ksolok tanba mate la iha kbiit hasoru ita-nia Maromak no mate la'ós liafuan ikus nian iha ita-nia moris, ksolok tanba Jezús nia domin kontinua iha Ninia Kreda no iha sarani sira nia hahalok ba sira ne'ebé kiak no presiza. Hanesan Amo Papa Francisco dehan: "Keta moris nu'udar mane ka fetos triste: sarani ida la bele moris nune'e!"



ATIVIDADE sira

Dansa ho ksolok

Bainbain, dalan ida ne'ebé ema uza atu hatudu katak nia haksolok mak liuhusi dansa. Iha Timor, festa kasamentu nian no festa hotu-hotu la fó ksook ba ema se la iha dansa. Bele organiza kompetisaun ida kona-ba dansa ida ne'ebé espresa ksolok: grupu ida-idak bele hili musika ne'ebé gosta, "juri" sei fó valór liuliu ba kriadividade (katak la lika "kopia" movimentu sira husi televisaun) no espresaun isin tomak nian (oin, liman, ain...) kona-ba ksolok.

2

Knananuk ba prezensa tinan 25 FMA sira nian

Ba remata fulan ida ne'e, comunidade ida-idak bele hatama knananuk ida ba selebrasaun prezensa tinan 25 FMA sira nian iha Timor; keta karik nu'udar oratóriu bele apresenta imi-nia knananuk foun ida kona-ba eventu ida ne'e?



Ha'u-nia ksolok

Ema ida-idak iha ninia esperiénsia kona-ba ksolok: bele halo entrevista ho ema ruma (foin-sa'e, labarik, katuas ka ferik, ...) no husu ba sira atu haktuir dala ida ne'ebé sira hetan ksolok boot, saida mak fó ksolok ba sira, sira fahe ksolok ida ne'e ho ema seluk? Oinsá?

Se iha imi-nia area se iha mala'e sira, bele husu ba sira oinsá selebra festa sira iha sira-nia rain: sira halo saida? Karik prepara aihan espesiál, karik konvida ema partikular...

3

JOGU sira



Fahe ksolok

Material: aifunan surat tahan nian no tali rafia atu bele tara sira; lafatik ida ba grupu ida-idak, hena pedasu ruma atu kesi ema nia ain

Preparasaun: Ba grupu ida-idak presiza oratorianu ida ne'ebé kaer lafatik no hamriik dook husi aifunan sira, oratorianu ruma ne'ebé kesi sira nia ain rua hamutuk no na'in 6 ne'ebé hamriik na'in rua na'in rua hodi kesi hamutuk sira nia ain. Kesi aifunan sira ba tali rafia no dada nia entre ai rua ka buat ruma aas utoan atu oratorianu sira tenke haksoit atu bele foti aifunan. Sira ne'ebé kesi hamutuk sira nia ain rasik hamriik iha aifunan okos; sira ne'ebé kesi ai na'in rua na'in rua hein katak kolega sira pasa ba sira aifunan ne'ebé sira "ku'u".

Bele halo grupu sira halimar iha tempu hanesan, ida-idak ho ninia tali ho aifunan, ka bele fó tempu minu 5 ba grupu ida; hafoin grupu seluk mak halimar.



Bainhira jogu hahú, sira ne'ebé iha aifunan okos tenke haksoit ho sira-nia ain rasik ne'ebé kesi hamutuk hodi haka'as an atu ku'u aifunan; ku'u tiha ida, sira sei fó ba na'in rua ne'ebé iha sira nia ain hamutuk no sei halai atu tau aifunan ida ne'e iha lafatik laran. Hatama tiha iha lafatik, sira fila fali iha sira-nia fatin hodi hein aifunan ida tan. Liu tiha minu 5, sira ne'ebé kuu aifunan para no halibur hamutuk ho sira seluk; ho aifunan ne'ebé iha lafatik laran sira forma fuan ida iha rai hodi tau aifunan sira ho distánsia liman ida nian entre ida no ida seluk. Hafoin sira sei haka'as an atu tama no hamriik iha fuan laran. Grup u ne'ebé forma fuan boot liu ho ema barak liu iha laran sei manán.



ISTÓRIA

Bainhira Maromak hakiak mundu no rai tomak ho ninia kriptura sira, loron dahitu, Nia deside atu halo festa ho kriptura hotu no husu ba sira atu lori buat furak ida ne'ebé sira bele hetan. Koellu sira lori senora, bibi malae fó sira nia fulun ne'ebé hamanas isin, bani sira lori banibeen no elefante sira oferese ba Maromak atu hariis Nia ho sira nia inus naruk.

Ema hein iha kotuk no kontinua hanoin saida mak nia bele fó ba Maromak. Kriptura hotu liu ema no lori sira-nia presente; bainhira ema besik ona Maromak nia ta'uk liu tanba nia la iha buat ida iha liman.

Bainhira nia momentu to'o, Maromak hateke ba nia hodi hein, entaun ema halo buat ne'ebé balada ida seida uk halo: nia haksoit hodi tuur iha Maromak nia ain, hako'ak Nia hodi dehan: "Ha'u hadomi Ita". Maromak nia Futar Oin nabilan liután no ema komprende katak ninia presente mak furak liu fali presente sira seluk.



DOM BOSCO nia esperiénsia

Husi Francisco Besucco nia moris

Francisco gosta halimar ho kolega sira, maibé bainhira sira hahú istori malu ka baku malu, nia halai kedas atu haketak sira: "Belun sira, ita la bele baku malu, liuliu ba buat ruma ne'ebé folin laek: ita presiza hadomi malu no komprende malu hanesan Maromak hakotu ona". Bainbain, ho liafuan hirak ne'e, Francisco biban atu halo kolega sira hadame malu. Maski halimar didi'ak hamutuk ho sira, bainhira nia rona sinu ne'ebé bolu atu ba eskola ka atu reza Francisco konvida kedas kolega sira atu husik jogu sira ne'e no ba. Loron ida ne'ebé nia halimar bola ho kolega sira, nia rona sinu atu ba tui katekeze, Francisco dehan kedas: "Belun sira, ita ba katekizmu, ita sei remata ita-nia jogu ida ne'e depois de selebrasaun iha parokia". No ko'alia tiha, nia halai kedas. Hotu ona selebrasaun, nia ba fali ho kolega sira, hodi fó hanoin ba sira ho laran di'ak katak sira lakon katekeze no mós selebrasaun, maibé atu halo sira sai metin liután iha ninia amizade, nia sosa frutas ruma ba sira. Hodi haree Francisco nia hahalok laran luak no kso lok nian, labarik sira promete katak sira sei la husik ona atividade relijaun nian, maski sei halimar daudaun.






IMAJEN

Imajen ida ne'e, loloos, la representa Jezús moris hi'as, maibé Jezús hamutuk ho labarik sira. Maski nuune'e, imajen ida ne'e bele tulun ita atu komprende atitude Jezús nian ne'ebé hakarak fahe ninia ksolok no domin.



Bele hatudu ba oratorianu sira no husu ba sira:

- ☛ Saida mak imi gosta iha kuadru ida ne'e?
- ☛ Iha kuadru, saida mak hatudu katak Jezús haksolok
- ☛ Iha labarik sira nia atitude ruma ne'ebé halo imi hanoin fali ba sira ne'ebé hasoru Jezús Moris Hi'as?



ORASAUN

Via Lucis

Iha Timor tinan barak ona ita reza Via Lucis. iha tempu Paskuál nian. Se durante Kuarezma ita la'o hamutuk ho Jezús tuir dalan Kruz nian, iha tempu Paskua nian ita la'o hamutuk ho eskolante no ema sira ne'ebé hasoru Jesús Moris Hi'as hodi fahe sira-nia ksolok. Iha semana hirak ne'e nia laran, comunidade sira foin simu Via Lucis foun ida ne'ebé bele hala'o ho oratorianu sira: bele reza tomak, ka hili estasaun ruma de'it, bele mós halo drama ba estasaun ida-idak, ka hatudu slides. Importante sente sentimentu ksolok nian ne'ebé eskolante sira esperimenta!

